

«Jeu hai adina vuliu turnar ella patria »

Cun 25 onns surpren Gianluca Vincenz il hotel «mischun» a Breil

SUSI ROTHMUND/FMR

Cugl emprem da matg surpren Gianluca Vincenz il hotel «mischun» a Breil. Ils possessurs, Hansjörg e Martina Schiess, selegran da saver surdar lur casa els mauns dil cuschinier e hotelier indigen ed era sin temps pli ruasseivels per els. Il giuven da 25 onns ei leds d'haver anflau ina nova sfida ella patria. «Il «mischun» ei nies pop», puntueschan Hansjörg e Martina Schiess che han schau baghegiar il hotel avon biebein treis onns. Suenter ina spassegiada tras Breil, eran els s'inamurai ella cuntrada. Quei ei stau avon enzacons onns e ladinamein han els priu la decisiun da midar cumplettamein lur veta. Aschia ha igl interpretider da success vendiu sia fatschenta per design da habitar e ha priu per mauns la realisaziun dil hotel ensemen cun sia partenaria. Enteifer cuort temps ha il pèr realisau lur siemi e menau dapi il 2018 cun success il hotel «mischun». Per els eis'ei stau ina caussa dil cor, d'anflar enzatgi che meina vinavon il pign, mo fin hotel en lur senn e stil. Cul hotelier diplomau indigen, Gianluca Vincenz, ein els perschua d'haver anflau la dretga persuna. El posseda l'energia e las habilitads ch'els possessurs dalla casa giavischan. Gianluca Vincenz descrivan ei lu era sco persuna simpatica, giuvna e dinamica. Ch'il hotelier diplomau ei carschius si a Breil en ina famiglia cun menaschi da gastronomia vesan ei sco ulteriur avantatg.

«Breil schloppa»

«Mes geniturs meinan il hotel Vincenz, mia sora ed jeu havein denton mai stuii segidar el menaschi, sche nus havevan buca plascher da far quei. Aschia sundel buca vegnius unfis e hai buca piars il plascher per la gastronomia. Malgrad ch'jeu savevel strusch cuschinar cu jeu sun vegnius ord scola, sundel sedecidius da far in emprendissadi da cuschinier a Sursaissa el hotel Central tier Andreas Baselgia», di Gianluca Vincenz. Suenter gl'emprendissadi ha el luvrau e rimnau experientschas en differentas cuschinas, sco per exempel en quella dalla Stiva Veglia a Schnaus ni era dil Parkhotel a Weggis. El cantun Lucerna ei siu giavisch da menar in di in hotel semanifestaus ed el ei sedecidius da far la scola d'hotellaria a Turitg. «Jeu sun staus bugen el marcau, mo hai adina giu il desideri da turnar enzacu ella patria», tradescha Gianluca Vincenz. Tema da surprender ina tala sfida – e quei aunc en temps da pandemia – ha el negina. Quei beinsavend che Breil ei pli ditg e pli fetg in liug turistic tschercau da stad ed unviern. «Breil schloppa», haveva era sia mumma Claudia resumau cun paucs plaids la truscha dalla stad vargada en ina emissiun dil Telesguard. Bunas premissas pia, per surprender in hotel el vitg da Breil. Aschia fan era ils geniturs da Gianluca Vincenz part dalla Briga Gastronomia SA che segna sco affittadra dil hotel «mischun».

Tuts per ti

El hotel «mischun» - cun atgna partiziun da wellness – vul Gianluca Vincenz che ses hosps sesentien bein. El meina il hotel e vul era esser presents ton sco pusseivel alla recepziun e bar: «Cheu essan nus tuts per Ti, quei derasa immediat in'atmosfera cordiala e famigliara.» Cugl

intent ch'ils hosps visetien las ustrias el vitg da Breil, porscha il «mischun» buca mesa pensiun. «Per fiastas da famiglias ni auters intents fagein nus secapescha bugen excepziuns», declara il giuven hotelier che porscha lavur a quater entochen tschun emploiai. Gianluca Vincenz ei cunscients dalla biara lavur e responsabladad che spetga sin el: «En outras branschas ei quei buc auter, tuts che lavuran sur sesez ston s'engaschar cumpleinamein», puntuescha el ed aschunta ch'ei seigi semplamein impurtont d'anflar igl equilibr e da sparter privat e fatschenta. Ei seigi stau bi da luvrar sco cuschinier e da procurar davos las culissas pil beinstar dils hosps. Suenter la scola d'hotelleria ha il Sursilvan denton era viu co igl ei da l'otra vart dallas culissas. El ha luvrau a Nottwil el hotel Sempachersee sco menader-substitut dalla gastronomia e purtau dabia responsabladad. «Ussa selegrel jeu silla nova sfida, jeu apprezzeschel il contact culla gliud e hai plascher d'empustir novs contacts», di Gianluca Vincenz. Sco indigen che va bugen a viandar, dat golf e va cun skis eis el senza dubi era la dretga persuna per dar a ses hosps buns tips co e nua guder il meglier lur vacanzas a Breil.